



桂勝第八卷

屏風山

山形折疊故以屏名去圓通灣不遠灣水紆
滴下接彈丸溪未至灣分道行稍北抵麓又
稍東巖門在焉其門東嚮上高下廣外屬平
野野無雜樹彌望皆長松七星諸峯近在東
南蒼翠明滅若涌松濤入巖見兩壁瑩潔如
新琢玉屏不但折疊微似已也深入十數丈
地漸高起又似築臺其上上有石如鍾墮地



高起處有石磴躡盡則天光直射為後小門
范公成大表以空明又於其外作壺天觀觀
久廢遊者憇飲巖中如在玉壺又右壁上有
懸崖可捫以登嘯呼其間又令人有五城十
二樓之想壁左有李彥弼為程鄰作建築充
州記故一名程公巖

虞衡志云屏風巖在平地斷山峭壁之下入
洞門上下左右皆高廣百餘丈中有平地可
宴百客仰視鍾乳森然倒垂者甚多躡石登

五十級有石穴通明透穴而出則山川城郭
恍然無際余因其處作壺天觀而命其洞曰
空明

詩

宋張孝祥 高巖劃天開仄徑通乳穴隈堆
青螺髻帶嶠白玉闕外有虎豹蹲中恐蛟蜃
蟄東縈俯雷電西出挾日月萬壑來悲風六
月不知熱但覺駭心目未易記筆舌平生山
水趣嶺海最奇絕洞府二十四未厭屐齒折

晚乃遊此巖餘地比僕妾同來六七士嗜好
頗相埒舉酒酌山神慰汝久湮滅

梁安世 宣政喜邊功隆允築州縣程公自
名巖 記所建得既不償費中興棄不繕

談謾磨崖辭當日妄誇銜英英石湖仙改作
壺天觀壁間之大字莊重如我弁詩文鸞鶴
音筆勢龍蛇攣登高瞰洞戶灑水澄如練勝
槩出靈臺遐觀起三嘆玲瓏二十四妙墨鐫
題徧我來為拂塵端茲侍顏面邦人頌遺愛

壽骨癯且徒今

麟堂安得使之見

文

宋侯彭老程公巖記 自湘南樓渡重江而

東林峒曠然距水五里有山如屏儼然高峙
若環群峯而主之其中卷然而虛曠而邃深
幽巖天成仙居神護凡數百步貫徹山之陰
高明爽塏下視七星山若導於前西顧洲渚
城邑可以指數蓋龍隱栖霞之所蘊蓄與夫
轉魁傲雲之所鋪寫是皆兼而有之備具衆

美冠於天南雖使造物者更復運意不可增
損崇寧之初鄱陽寶文程公始開是巖方是
時桂人樂公之化而從公之游蓋無日不熙
然也咸以程公巖名之遺愛在人百年之思
景物如昔言者墮淚後數年公之子旣來帥
桂其忠義文武所以爲國家捍邊而庇其民
者亦如公而年尚壯力方剛福祿功名未易
量也公之盛德可信者如此則是巖託公以
久者當與召芟同日而語又非特若羊公之

峴山而已昔柳子厚爲裴中丞記訾家洲其
辭瑰怪然徒列遊觀之勝而是巖也余可以
無藉乎

范成大壺天觀銘并序 凡洞穴皆幽闇偏
仄秉燭而遊唯屏風巖高廣壁立如康莊大
厦延納暉景內外昭徹石湖居士名之曰空
明之洞繇磴道數拾級出小石穴山川城郭
恍然無際乃作觀臺是名壺天游客詫曰大
哉斯壺函裏如許居士曰世所有相如空浮

華心目顛倒

故善巧者能於寶珠

及以芥子乃至毫端出現塵刹彼觀者不覺
不知況一壺扒客悟且笑曰然則游戲神通
耶居士亦笑而爲之銘曰心塵目華三昧現
前我提一壺彌羅大千無有方所四維上下
此三昧門溥施遊者

題名

經畧安撫蔡懌樂道提點刑獄尚用之仲明
廉訪使者張洵仁仲宣和甲辰八月初八日

同遊

桂林巖洞冠天下而此巖最清絕又五嶺之
冠也延平鄧公衍彥達宜春藍茁文穎秦臺
西門賞進賢平陽丘阡仲通建炎戊申天申
節日來遊

經畧安撫建安周與道提點刑獄江東程巨
用廉訪使者開封侯晉卿建炎二年十月初
五日同遊飯罷乘輿遊栖霞洞

許中甫遊慶林來此庚辰六月廿八日題

李似之林德充許師仲兩仲同來乾道丁亥十一月廿有四日

明年秋七月甲子師仲與二水唐德柄二衢劉公實復來後三日再至

經畧安撫使范成大新作壺天觀提點刑獄鄭丙落其成轉運判官趙善政提點坑冶經畧錢守大止同集淳熙改元十月十日

夏彥鴻淳熙甲午仲秋題

淳祐丙午復亨之明日永嘉翁安之恭父寶

婺章文之文叔開封劉必聞達可廬陵郭有道景泰左讜忠父盱江黃應龍正父周子榮景仁縉雲潘景丑孟清江龍奎沃定同飲錢南海錢益良輔於簪帶亭乃由栖霞步曾巖登辰山重會於此是月也瑞雪翔空愛景騰耀群玉獻狀沃野如繡暎焉良集於是乎書灑山人曰余從巖壁讀李彥弼兗州記而重有感於立名之難焉程氏帥桂暴兵竭貲以奉異類外之奉示州部內自結於君相顯有

榮名世載不替宜矣未幾而貽梁安世之刺
其指與宋史符豈漢法所謂附下罔上懷諛
迷國者耶夫既偷取及身之榮又欲規徼永
世之譽假寵文士雕篆名山自以為計之得
李記豔矣如罔功實何故不敢取載侯語卑
卑第為山存之至今里人亦無復知有何程
公巖者范文穆在鎮坦示綏褻不矜威畧公
府多暇率遊宴水石方赴桂記驟鸞比去桂
入蜀虞衡有志今見傳世間吳則丹青石湖

桂則俎豆名宦不期名而名隨之太史公曰
名不虛立士不虛附茲巖見之矣

桂勝第八卷

桂勝第九卷

疊綵山



桂城直北重門夾山山分東行曰鎮南歷仙
鶴至疊綵其洞亦以山名一曰風洞洞左小
山曰干越其右小支戟立曰四望唐元常侍
晦各有小記鏤於其山多所發明越亭一詩
為茲山麗製至其移鎮浙東戀戀不忍去見
於留別之詠三山蓋常侍之清賞處築鑿之
盛畧具風土記中當揭帝未陸時廣池漸葺

茂樹連山千越四望擁翠而前殘霞斷靄澹
漫層崖何異壘綵然不但石文已也洞後則
堯山蔽天而下灑江若練南下闔鷄目之所
游群勝交集又四望之下亂石縱橫枕籍排
突半起半伏坡陀隱軫門逕延曼亦他山所
希有右極城北蒼翠繇絡下則泯泯上則瞻
鶴諸巖互經亦其輔也

風土記云越亭在府城北與壽聖寺接連有
巖洞亭臺高峯碧嶂山穴透出北面因名北

牖洞遠眺長江極目煙水北人至此多軫鄉

思會昌初前使元常侍晦搜達金貂翱翔翰

林楊歷臺省性好巖沼時恣盤游建大八角

亭寫其真其院即為寫真院歌臺釣榭石室

蓮池流盃亭花藥院特為絕景于時潞寇初

平四郊無壘公私宴聚較勝爭先美節良辰

尋芳選勝管絃車馬闐隘路隅

虞衡志云壘綵巖在八桂堂後支徑登山大

半有洞曲轉穿出山背

詩

唐桂州刺史兼御史中丞元晦越亭二十韻
之才叨八使徇祿非三顧南服頒詔條東林
證迷誤未聞述職効偶脫囂煩趣激水濬坳
塘緣崖欹磴步西巖煥朝旭深壑囊宿霧顯
氣爽衣巾涼颺輕杖屨臨高神慮寂遠眺川
原布孤帆逗汀煙翻鷗集江樹獨探洞府靜
况若倥傯遇一瞬契真宗百年成岳故孱顏
石戶啓杳靄溪雲度松籟韻宮商駕靈勢翔

遡津梁危約架濟物虛舟渡環流馳羽觴金
英妬粧婢笳吟寒壘迥鳥噪空山暮悵望麋
鹿心佷迴車馬路懸冠謝陶令褫珮懷疏傳
遐想蛻纓綉徒慙卹襦袴福盈禍之倚權勝
道所惡何必栖禪關無言自冥悟
又除浙東留題 紫泥遠自金鑿降朱旆翻
馳鏡水頭陶令風光偏畏夜子牟衰鬢暗驚
秋西隣月色何時見南國春光豈再遊莫遣
豔歌催客醉不堪回首翠娥愁

副使路貫和 謝安致理逾三載黃霸清
徹九重猶輟珮環歸鳳闕且將仁政到稽
林間立馬羅千騎池上開筵醉一鍾共喜
裳有新詠獨慙霜鬢又攀龍

宋朱晞顏前有小序 新安朱晞顏携家訪
疊綵巖登越亭下臨江流清風時至忘其夏
日之畏云因書以紀歲月寔紹熙甲寅重五
後二十日也

不到越亭久榴花今幾紅江流寒瀉玉山色

翠浮空百越薰風裏三湘夕照中行藏仗忠
信六合本同風

無名氏題分水嶺 無愁為不負人間荒徼
虛名是老關雁迴白日迷千嶺猿叫黃昏隔
兩山 下刻嗣吳不知為何人

文

唐元晦疊綵山記 按圖經山以石文橫布
彩翠相間若疊綵然故以為名東至二里許
枕壓桂水其西巖有石門中有石像故曰福

庭又門陰構齊雲亭迥在西北曠視天表想
望歸途北人此遊多軫鄉思會昌三年六月
歲功南自曲江上極山林四年七月功既
又干越山記文多剝落不可讀大都紀其剏
構亭榭與山名干越之故略可見者栽數十
字曰直渚之北有虛楹釣榭由此三逕各趨
所抵左指山隈右向之僧舍為寫真堂北鑿
山逕由東崖茅齋經栖真洞而北史記云秦
并諸侯以百越之地為桂林郡吳遣步騭征

南克有干越此後惟有吳都賦字不可讀矣
又四望山小記 山名四望故亭為銷憂亭
之前後綿絡山腹皆逕梁危磴由西而北復
東上疊綵右崖至福庭石門約三十餘步

題名

安南桂管宣慰使馬日溫送馬祭酒上後因
遇吳王三人同遊此洞元和九年春四日題
南豐曾布子宣浦城陳倩君美符離苗時中
子居永安劉宗傑唐輔歷陽齊諶子期長興

劉誼宜夫元豐二年六月初三日同遊

建安謝勳信都李温古原田永年淮海楊書

思政和三年癸巳二月二十四日遊石門洞

淳熙戊戌春分日桐廬詹儀之體仁與僚屬

來遊王登與王俊仲瑤周邦弼直卿鄭鄭

夢授

開禧丙寅寒食日浚儀趙善恭作肅領兒輩

汝冽汝瀧汝湜汝渲婿武陽謝寧孫鄧友直

來遊外甥謝資鄧筠侍行

吳穎仰方夷吾子容劉孟公來辛未三月丁

酉

干越山有唐貞元年間吉州康司士義興房

丞江陵韋隨軍皆以所鐫字滅失其名惟前

進士陶立言則可觀者亦當時來遊之題名

也

疊綵山三大篆字又有福真洞三字亦篆書

干越山三字橫列自左而右山下有栖真洞

及洞北門共九大字皆用篆

四望山亦三篆字不著書者姓名然皆元晦
時所題鐫

混沌巖三大字亦篆文

灑山人曰諸言疊綵山者一曰桂山以山多
產桂又云其上有越王臺一名越王山至問
其故則曰五代馬氏以弟竇節度桂築臺其
間遺址尚在雖然州既稱桂山悉從之何獨是
山得顓桂哉第如所云以多產桂柰何今寥
寥也且疊綵之名元常侍自謂本之圖經非

自唐始何不遵用而必曰桂又馬殷乘亂起
竊據湖南一竇何足道顧越王之何其悖哉
于越四望不復為游人所屬目卽越亭亦罕
有能道其事豈非以涿池楊塵雕闌滅迹無
從按視與常侍至今七百有餘歲三山遺刻
詞采清蔚可備誦覽者卒莫有出其上不以
屬之反循他稱可乎藉令越王隆臺中天祇
取辱焉惜華景失其巖光亭詠可為寶積發
太息也已

桂勝第九卷

桂勝第十卷

寶積山

夾北城而西是為寶華當山中斷續以雉堞
下有重門為西清寶積山自南來交扼其口
前巖東嚮為華景華景之前橫塘深廣晨飄
霞綺夕麗金波得水而觀益增故唐元常侍
晦建亭一曰巖光以巖拂水而寫光也石屋
平敞可視龍隱其後則翠壁上蟠漸至峯首
有諸葛祠從北至西城壁峻削皆斬崖為之

雖石頭之險不能過也唐以前謂西阜高起
名其地爲盤龍岡諸葛之祠無亦因岡名與
臥龍微相似耶或曰珠合不識所謂然此五
六山峯嶂叅錯北城據之其險亘天而疊綵
寶積兩巖洞分市對開其上若北城東西兩
翼又皆在城中不獨人士游賞斯集至於冠
蓋往來南北望皇華之清塵申折柳之餘戀
非東之疊綵則西之寶積矣

風土記云巖光亭在北羅門外臺亭巖洞亞
於越亭亦是元常侍新置有石碁局欄柯石
虞衡志云華景洞高廣如十間屋洞門亦然

詩

唐元晦 石靜如開鏡山高若聳蓮筍竿抽
玉管花蔓綴金鈿

此詩蓋長律其刻至宋尚在今莫能得惟
風土記存此四句爾

宋呂愿忠 斯洞名華景纍纍乳石懸虛崖
疑月窟絕頂瞰江湍巖底金仙 峯頭玉井

蓮地形居衆外氣象偉無前徙杖觀初日歸
輿觸暝煙蔽林排翠幄封蘚簇花鈿幽致恣
清賞鐫題記昔年猿啼聲應谷雲破月侵筵
策蹇追華駟鳴弦指墜鳶誰人能畫此爲倩
老龍眠

張自明

踏破蒼苔覓舊題五言覓得晚唐

詩巖光人憶遺名好華景天開一段竒鐵鎖
掣關纏壁壘玉梯穿路透瑤池古心未展開
遊戲慙愧平生華子期

鄭會龍題蔣詩翁故居

詩翁仙去舊壇荒

雲滿空山花自香老盡游人春不問杜鵑聲
裏幾斜陽

文

宋李曾伯紀功碑 寶祐戊午朝廷合二廣

割制閩命曾伯再牧防南鄙也尋調建康都
統制朱廣用領軍來戍於是此諸道戍兵並
委之總統相與修浚城池為保固計是秋韃
犯州邑境賴我師遏之不致深入明年開慶

已未築鑿南峻邊遠已勤七月虜渡烏泥江
八月犯橫山九月二十二日薄我城下幸壁
壘具將士用命一鼓而殲賊前鋒遂引退砦
於數十里外我師晝夜攻刦大小十餘捷賊
氣頗沮相持兩旬由間道而湘亟遣兵追襲
一捷於黃沙剪其渠魁俘獲甚衆再捷於衡
山剽殺幾盡賊不克逞以遁陰山極北之寇
犯炎方宅南之境偵伺二十年馳驚數萬里
擁衆驅蠻而入乃載籍所未有向非桂林砥

柱其衝師武臣力敵王所憺廣南亦岌岌甚
矣此皆宗社威靈天人祐助億萬載無疆之
福也茲制閩結局都統制且徹戍以歸礮石
請紀文武賓校氏名載念獸夷犯順非小變
也連年得以固我封守吾民克免翟難誠同
舟共濟者之力矧蒙烟瘴犯霜露備極勞苦
是不可不紀以示永久非事誇詡也提刑提
舉兼叅謀四明豐蒞制機左綿文可嗣眉山
家寓河內李曾伯制議永嘉鄒琳制幹清湘

管安昌襄陽李湜盱江聶世堅合沙卓年龍
制僉長沙凌炳炎耒江陳彌壽括蒼張建大
濟南楊延九江劉烈清湘趙龠夫廬陵朱埴
會稽陳策制帳都統制長沙朱煥總管峴山
彭興浮光余夢發都梁丘正浮光朱大德壽
陽王勝金陵王達金陵陳邦傑浮光張琦鈴
路統制合肥程俊泗水周旺胡梁李慶山陽
楊俊浮光周勝海陵戴俊戎司屬官浮光吳
起宗清原羅萬敬古雲鄭祥

題名

大宋嘉祐三年秋七月安撫兼經畧刑部郎
中直昭文館知桂州蕭固幹臣轉運使金部
員外郎王罕師言因宴北郊語臨桂令梁庚
闢萊地得一古洞有刻曰華景其石壁唐
桂州刺史御史中丞元晦巖光亭詩在焉乃
會昌五年四月十日題蓋武宗之乙丑年也
其蕪沒則不能審於何時逮今踰百祀也而
復新之於師言且洞無情物爾而得幹臣師

言而興生靈者其興又可詳矣復再踰月十
有六日幹臣師言與提刑也田郎中宋咸貫之
同提刑文思副使王琚彥溫鈐轄供備庫使
李繼明嗣昌通判也田負外郎周約中立復
遊於是貫之因本所以然而書其崖云

提點刑獄李師中前瓊守謝鴻郡丞黃照慕
下孟庭堅段惟修周佺會此巖下嘉祐辛丑

正月十九日

兵馬都監閻紳君儀筦界巡檢劉永世延之

和興安縣卞玄冲道淵熙寧甲戌孟冬初六
日會此

似渠景淵令升少隱公弼同來紹興五年閏
二月初十日

嘉定癸酉長至前四日方孚若邀管定夫陳
膚仲來觀膚仲書榕臺二字贈主人使鑿之
嘉定七年夏五江西張自明與定武趙蔚來
遊

寶積山三篆字在今傍山居者屋後石壁因

言壁側有呂公巖榕臺亦在其地
灘山人曰山故有元在菴主居自為歌述元
在之意皆西方餘論流入中土者所演說例
不采錄又蔣詩翁亦卜築其間名氏既滅文
字並亡夫蘭可折而薰不可奪故焚之而香
生玉可碎而光不可蝕故磨之而彩映蔣翁
誠深於詩乎金膏玉液與寶積不毀可也李
所詠雲非指本山張詩自怨衰宋反咲晚唐
伺其謬也顧不視李刊去之得無以巖光存

哉紀功碑文非孟堅功異車騎且與寶積不
相涉槩當黜之然北虜深入遠窺南徼自天
地剖判所未有之事其變非常存以詔來毋
忽遠憂焉寶華伊邇胡李兩公築城浚隍圖
狀具在雖章時發記漫滅不可讀且摹且抄
歲在故府非識微者所深念乎桂嶺乃在臨
賀彼中自昔有桂嶺縣與寶積前小坡何豫
宋令甲府帥監司度嶺得任子厥後以道不
經彼尋削斯賞呂源何為鐫石坡上罔主聽

而市倖賞其大節可徵已如曰不然請視范
公成大駟鸞錄

桂勝第十卷

